

# 1 Corinthians

## Tiroma Leta Paul Mo Ulia Isana Mara Corinth

### Leta Nike

Leta akerihi mo usuri leta na tinapua matea Paul mo ulia isana mara Corinth moiso (5.9), hin leta nike Paul mo řarami na nora retiusia sei la sohaia isana moiso (7.1). Corinth enia taon tavera jea matea na pahisa tasi Greece. Vao kalesia Corinth la patumasa, la lo aseasera (1.10–4.21). Mo řarami na retiusia mata lahi (7.1-40), mata hanhahi sei la silea isana tamasi (8.1-13), mata posposi tataholo mata lotu (10.1–14.40), peresi na sauteterahi non Iesu peresi na nona tamlohi usuri (15.1-58). Paul mo vereia isara mara opoia mo aulu jea, mo jeu na rasua peresi na řomtoho matan enia i pa toho jejeu (13.13).

### Hin Leta Nike

1. Tiroma Retireti Non Paul (1.1-9)
2. Paul Mo Vereia Mara La Turu Jara Matea (1.10–4.21)
3. Mauri Na Vao Kalesia (5.1–7.40)
4. Posposi Tataholo Mata Vao Kalesia (8.1–11.1)
5. Posposi Tataholo Mata Lotu God (11.2–14.40)
6. Křisto Mo Aulu Na Mateia (15.1-58)
7. Silesilea Nona Kalesia Jerusalem (16.1-4)
8. Paul Mo Hahau Corinth Mata Sava (16.5-12)
9. Retioloolo Non Paul (16.13-24)

---

### Retioloolo Non Paul Isana Kalesia

**1** <sup>1</sup>Enau Paul, na vahařule non Křisto Iesu usuri na masalon God, peresi voraiřa Sosthenes, <sup>2</sup>kama sohai leta nike isana vao kalesia non God Corinth, isana tapuhi hin Křisto Iesu, God mo tovi kamim

tapuhi peresi la haratu na jara tari sei la lo lotu Moli Iesu Křisto, nora Moli, ale enia nořa Moli,

<sup>3</sup>řomřuhu peresi na tamata la tai isan God Tamařa, peresi Moli Iesu Křisto, la vano isamim.

### Paul Mo Vere Meje Isan God

<sup>4</sup>Na lo vere meje isan God tarea matamim matan řomřuhu sei God mo silea isamim hin Křisto Iesu, <sup>5</sup>matan enia mo vai kamim ka ulua mo řuhu hinia na retireti tari peresi na lelevosahi tari, <sup>6</sup>harihi mo vujangia vara sava na vere isamim matan Křisto mo varařuhu na maurimim, <sup>7</sup>matan vara ka sopo vejuveju hin te otori sei Tanumen God mo lo silea, ale ka lo kilau matan rani atu nořa Moli Iesu Křisto i pa mele pala hinia, <sup>8</sup>enia i pa vai na nomim rasua i řilangi i kakau na isoisona, i pa sopo tea i eři tuvai kamim hin te hinau hin rani atu non nořa Moli Iesu Křisto. <sup>9</sup>God enia i sopo eři tope na nona retitauhi, God mo tovi kamim vara ha tapala peresi Natuna, Iesu Křisto, nořa Moli.

### Patumasa Na Lolo Vao Kalesia

<sup>10</sup>Na lo usia řilangi isamim la voraiku peresi na vevoraiku, na hijan nořa Moli Iesu Křisto, vara kamim mo isoiso nomim reti i matea, ale i sopo te patumasa isamim, pani ha matea na řomřomi matea, ale ha matea na nomim ari. <sup>11</sup>Matan la voraiku peresi na vevoraiku, na rongo na reti matea mo tai na vaon Chloe vara, kamim ka lo vasvas isamim. <sup>12</sup>Na lo vere matan vonamim hai la lo vere lara, “Enau na usuri Paul!” tea la vara “Enau na usuri Apollos!” tea la vara “Enau na usuri Peter!” moiso tea la vara “Enau na usuri Křisto!” <sup>13</sup>Ha eři topetope Křisto? Paul mo mate na talopeilopei matamim? Teni ka lavi na paptijo na hijan Paul? <sup>14</sup>Enau na lo vere meje isan God matan enau na sopo paptijo hin te vonamim hatea, pani Crispus peresi Gaius purongo, <sup>15</sup>matan vara i pa sopo te vonamim hatea i eři vere vara enia mo lavi na paptijo na hijaku. <sup>16</sup>Varařuhu, na paptijo na vao iman Stephanas, pani korong na sopo mele paptijo hin te tinapua. <sup>17</sup>Matan Křisto mo sopo řuleau vara a paptijo, pani vara a retivujavujangi na Retiřuhu ale mo sopo hin te reti mo řilangi mata levosahia, vara i vono talopeilopei non Křisto i pa sopo te řaramina.

### Lelevosahi Non God

<sup>18</sup>Matan reti mata talopeilopei enia hina rongorongo vono isan la haratu la lo vano na komokomo, pani isařa sei řa juri hinia, enia suihan God. <sup>19</sup>Matan Isaiah mo ulia vara,

‘Enau a pa komo na lelevosahi  
nona tamlohi lelevosahi,  
ale a pa vai na řomřomi nona tamlohi lelevosahi

i mai hina purongo.’

*Isa 29.14*

<sup>20</sup>Nene tamlohi lelevosahi? Nene tamlohi vujangi mata leu non God? Nene tamlohi mo eñi retireti na varama nake? Ra eñi vereva vara God mo vai na lelevosahi nona tamlohi mata varama la mai hina rongorongono vono purongo. <sup>21</sup>Matan usuri na lelevosahi non God, God mo taua vara tamlohi na varama, la sopo eñi lavutia na nora lelevosahi purongo. God mo avulahi vara i juri la haratu la rasu na hina rongorongono vono sei kama lo retivujavujangi hinia, <sup>22</sup>matan Jew la lo usia řilangi vara God i vai te matamata vara la hitea ale la pa rasua, ale tamlohi řořoha la opoi vara la ale na lelevosahi vara la rasua, <sup>23</sup>pani kamam kama lo retivujavujangi na mateia non Křisto na talopeilopei, enia hina tialahalaha matea isana Jew, ale enia hina rongorongono vono isana tamlohi řořoha sohena mara Greek. <sup>24</sup>Pani isařa sei God mo toviřa, hina purongo vara enřa Jew teni tamlohi řořoha, enřa řa eñi hitevosahi na suihan God peresi na nona lelevosahi řuhu hin Křisto. <sup>25</sup>Matan hina rongorongono vono non God enia mo jeu na lelevosahi nona tamlohi, ale hinau non God sei tamlohi la vereva vara mo sopo te suiha hinia, enia mo jeu na suiha nona tamlohi.

<sup>26</sup>Ale la voraiku peresi na vevoraiku, ha to řomřomia vara hin rani atu God mo tovi kamim, mo sopo te matuvana isamim ka tamlohi lelevosahi na naho tamlohi, mo sopo te matuvana ka tauri na suiha, mo sopo te matuvana ka vora tamlohi aulu. <sup>27</sup>Pani God mo viřoni na hinau la rongorongono vono na varama matan vara i vai na tamlohi lelevosahi la mahanuhanu; ale God mo viřoni na hinau sei mo sopo te suiha hinira na varama vara i vai na tamlohi suiha la mahanuhanu. <sup>28</sup>God mo viřoni na hinau la atano na varama, tamlohi la hiteřesira, hinau mo sopo te hinau hinira, mo vaira matan vara i vai la hinau sei tamlohi la lo vereva vara la hina aulu, la mai hina purongo, <sup>29</sup>matan vara tea i pa sopo eñi retihapahapa na nahon God.

<sup>30</sup>Enia pulo maurimim hin Křisto Iesu. God mo vai Křisto enia nořa hina lelevosahi, enia natu, mo vaiřa řa tataholo na nahon God, ale enia malele mata vaiřa řa tapu, enia mo hase silea vara i volituhuřa. <sup>31</sup>Ale matan haratu sohen la ulia vara,

‘Mo řuhu vara haratu mo lo retihapahapa,  
i pa hapahapa hin Moli.’

*Jer 9.24*

### Talopeilopei Non Křisto

**2** <sup>1</sup>La voraiku peresi na vevoraiku, hin rani atu na mai isamim, na sopo mai vara a retivujavujangi na hina luhu mata juri non God na retitavera teni na retilelevosahi. <sup>2</sup>Matan enau na tau na řomiku vara a pa sopo vujangi te hinau tinapua pani Iesu Křisto purongo, ale hin na nona mateia na talopeilopei. <sup>3</sup>Ale hin rani atu na lo toho peresi kamim mo sopo te suihaku, na matahu, ale

na savaravara tavera matan na sopo levosahia vara sava i pa masese isaku, <sup>4</sup>ale noku retireti peresi na noku retivujavujangi la sopo retihaluhalu mata lelevosahi, pani na limaku Tanumen God mo vujangia isamim na matamata peresi na suiha, <sup>5</sup>matan vara nomim rasua i pa sopo turu na lelevosahi nona tamlohi, pani na suihan God purongo.

### Lelevosahi Mo Tai Isan God

<sup>6</sup>Pani isan la haratu la jea, kama lo retireti na hina lelevosahi, pani mo sopo na hina lelevosahi mata varama nake, teni hina lelevosahi nona tamlohi aulu mata varama nake, enira la haratu sei la lo vano na nora komokomo. <sup>7</sup>Pani kama lo verea na lelevosahi non God matea sei mo lo luhu, enia God mo taua matafa tuai moiso varama mo sopo lo toho, matan mauri ruhu ruhu atu na tuka. <sup>8</sup>Mo sopo te tamlohi aulu na varama nake i levosahia matan, vara la pa lo levosahia la pa sopo vili matei Moli mata ruhu ruhu hin talopeilopei atu. <sup>9</sup>Pani sohen la ulia mo verea vara, 'Sava te mata mo sopo lo hitea, teni te pero i rongoa, teni tea i romromia, sava God mo tau mamahunia moiso, matan la haratu mo lo opoira.'

*Isa 64.4*

<sup>10</sup>La hinau nike, God mo vujangia isaia hin Tanumena. Matan Tanumena mo levosahi na hinau tari peresi na lolo romromi non God. <sup>11</sup>Matan hare mo levosahi na romromi non tamlohi tinapua matea pani tanumen tamlohi atu purongo sei mo lo toho na lolona? Ale mo sohena purongo, mo sopo tea i eri levosahi na romromi non God pani Tanumen God purongo. <sup>12</sup>Ale nake, enia ra sopo lavi na tanume mo tai na varama, pani ra lavi Tanume atu mo tai isan God matan vara ra pa eri levosahi na hinau God mo sile purongoia isaia. <sup>13</sup>Ale kama vujangi la hinau sei mo sopo usuri na lelevosahi nona tamlohi, pani na retireti Tanumena mo vujangia isamam, kama lo sototahi na romromi non Tanumena peresi na retivara ruhu non Tanumena, ale kama vereulira isan la haratu Tanumena mo lo toho isara. <sup>14</sup>Tamlohi purongo i sopo eri lavi na hinahinai non Tanumen God, matan enira hina rongorongono vono isana, ale enia i sopo eri levosahira matan Tanumen God purongo i eri vujangira isana. <sup>15</sup>Tamlohi atu Tanumen God mo lo toho isana, i eri ari mamahuni na hinau tari, pani tinapua i pa sopo eri mele ari tamlohi atu. <sup>16</sup>Matan reti non God mo verea vara, 'Hare mo levosahi na romin Moli?

Hare i pa eri pisuhi na malele isana?'

*Isa 40.13*

Pani enia ra lavi na romin Kristo.

### Volitusi Non Kristo

**3** <sup>1</sup>Pani, la vorai peresi na vevorai, hin rani atu enau na lo toho peresi kamim, na sopo retireti isamim sohena tamlohi rasua la jea. Mo

vono. Na lo retireti isamim sohena natuvarihi matan ka pa lo usuri na posi tamlohi varama, ka pa lo pipi na maurin Křisto. <sup>2</sup>Na vahani kamim na wai susu, mo sopo na hanhani řilangi, ale mo tikeli nake, ka sopo lo tatamahu matana, <sup>3</sup>matan ka pa lo toho na suiha masalomim. Matan ka mereimerei hin kamim hatehateahi, ale ka lo vasvas hin kamim hatehateahi. Matan posposi sei mo vujangia vara kamim ka pa lo toho na suiha masalomim. Ka lo hahau sohena tamlohi varama. <sup>4</sup>Matan vonamim matea mara, ‘Enau na usuri Paul!’ moiso tinapua mo vereea mara, ‘Enau na usuri Apollos!’ mo vujangia vara ka lo hahau sohena tamlohi purongo.

<sup>5</sup>Apollos enia mo řuhu mata sava? Paul mo řuhu mata sava? Kamam volitusi, ale hin kamam kamim ka mai na rasua, sohena Moli mo taua moiso vara hare i pa vai na sava. <sup>6</sup>Enau na lavo, Apollos mo tau na wai, pani God natu, mo vaia mo ulua. <sup>7</sup>Haratu mo lo lavo teni haratu mo lo tau na wai, mo sopo te hinau řuhu hinia, pani God purongo sei mo lo vaia mo ulua. <sup>8</sup>Haratu mo lo lavo, ale haratu mo lo tau na wai, enira la matea, ale la pa lavi na volira i tataholo na sava la lo vaira hatehateahi. <sup>9</sup>Matan kamam kama tapala na vavahinau non God. Kamim lovuhai non God, ale ka iman God.

<sup>10</sup>Enau tamlohi tavera mata voro ima usuri na řomřuhu non God, ale na tau na pulo ima, ale tamlohi tinapua matea mo lo voro aulu hinia. Mo řuhu vara tamlohi hatehateahi i kilau mamahunia vara sohena sava i pa voro na ima hinia. <sup>11</sup>Matan mo sopo tea i eři tau te pulona tinapua hin haratu mo lo toho moiso. Enia sei, Iesu Křisto. <sup>12</sup>Vara tea i voro hin pulona atu na gold teni silver, teni vatu angiangi řuhu, teni mo lo voro hin te vipahai teni rato teni ere, <sup>13</sup>voko nona tamlohi hatehateahi, i pa mera purongo matan rani aria i pa vaia i mera, matan suiha hapu i pa vaihite na voko nona tamlohi hatehateahi vara mo sohena sava. <sup>14</sup>Vara te voko atu sei tea mo voro aulu hin pulo ima atu mo jeu na hapu, enia i pa lavi na nona otori matana. <sup>15</sup>Vara hapu mo hani vevuhi na voko non tea, nona otori i pa tihai, ale tamlohi atu i pa juri, pani i pa sohena tamlohi matea la juri nařihia na hapu mo lo turu lekoleko purongo.

<sup>16</sup>Ka sopo levosahia vara kamim ka temple non God, ale Tanumen God mo lo toho na lolomim? <sup>17</sup>Vara tea i komo na temple non God, God i pa komoa, matan temple non God enia mo tapu, ale kamim natu, ka temple atu.<sup>a</sup>

<sup>18</sup>Tea i sopo eři hase halua hasena. Vara te vonamim mo lo řomřomia vara enia tamlohi lelevosahi matea hin varama nike nake, i pa mele řuhu jea isana vara i mai tamlohi rongorongono vono, matan vara i pa mai tamlohi lelevosahi varařuhu. <sup>19</sup>Matan lelevosahi matan varama nike, enia rongorongono vono isan God matan la ulia mo vereea vara,

---

**a 3.17 temple:** Paul mo lo vere temple nike, ale řaramina enia matavuhi nona kalesia hin jara atu, mo sopo vereea na epe tamlohi matea.

‘Enia mo vunai na tamlohi lelevosahi  
na nora posposi mata lelevosahi.’

*Job 5.13*

<sup>20</sup>Ale mo mele vereea vara,

‘Moli mo levosahia vara řomřomi nona tamlohi lelevosahi  
la sopo řuhu matan te hinau hatea.’

*Psa 94.11*

<sup>21</sup>Matan mo sohena, i pa sopo tea i eři hapahapa hin te hinau nona tamlohi. Matan hinau tari enira mata tueni kamim, <sup>22</sup>vara Paul, teni Apollos, teni Peter, teni varama, teni mauri, teni mateia, teni hinau nake, teni hinau la pa mai, enira mo isoiso nomim, <sup>23</sup>ale kamim non Křisto, ale Křisto enia non God.

### Vavahinau Nona Vahařule Non God

**4** <sup>1</sup>Kamim mo tataholo vara ha kilau kamam sohena volitusi non Křisto, volitusi sei mata tauri na hina tatalanghi non God. <sup>2</sup>Ale aulu hinia, mo tataholo vara la haratu la lo tauri na hinau sohena, la pa turu řilangi na sava la lo vaia. <sup>3</sup>Pani enia hina rihirihi purongo isaku vara te vonamim teni te court nona tamlohi hatea i ariau. Varařuhu, matan enau haseku na sopo ariau. <sup>4</sup>Na sopo řomřomi te hinau vara na vaia mo sati, pani mo sopo haratu natu vara mo vaiau na tataholo na nahon Moli, matan Moli hasena i pa ariau. <sup>5</sup>Matan hinau sei, ha sopo sile te talai i tiroma hin rani atu mata aria, i tiroma na mele mai non Moli sei i pa lavi na hina luhu na řořoha nake la mai na malarani, ale i pa vujangia vara tamlohi la lo vai na nora vavahinau mata sava. Ale hin rani atu, God i pa sile na nona reti řuhu isara hatehateahi.

<sup>6</sup>La voraiuku, na lo vereea enau Apollos sohen tovongi matea isamim mo usuri na noku vujangi nike. Ale vara ha turu na sava la ulia na Retitapu moiso, ha pa sopo eři retihapahapa hin te tamlohi hatea matan mo pa aulu na vavahinau non tinapua. <sup>7</sup>Sava mo vai kamim ka řomřomia vara ka řuhu ka jeu na tinapua? Sava enia nomim sei God mo sopo silea isamim? Ale vara hinau tari nomim mo tai isan God, mata sava ka lo retihapahapa sohena vara ka sopo lavi te hinau isana?

<sup>8</sup>Ka pete lavi vevuhi na hinau tari ka opoira moiso. Ka pete tavgav moiso. Ka jeu kamam matan ka pete supe moiso, ale i pa řuhu vara ka pete tauri suiha atu moiso matan kama pa tauri na suiha peresi kamim. <sup>9</sup>Matan na hitea sohena vara God mo tau kamam vahařule sohen tovongi matea, mo tau kamam hitahu jea na tamlohi,<sup>b</sup> sohena tamlohi la lo vano

---

**b 4.9** hitahu jea na tamlohi enia mo lo řarami rani atu tamlohi vuro la lavi la tamlohi atu mata vilimateira la taura na isoiso vao atu sei la tiroma hinira na naho tamlohi tari na rani la mele pala na jarara tataholo.

na nora mateia, kama mai sohena hinau matea varama peresi na angelo peresi na tamlohi la pa varoia.

<sup>10</sup>Kamam kama tamlohi rongorongo vono matan Křisto, pani kamim ka tamlohi lelevosahi hin Křisto. Kamam kama tamlohi malum, pani kamim ka tamlohi řilangi. Kamim, tamlohi la sile na ooloo isamim, pani kamam, la hitelehilehi kamam. <sup>11</sup>Mo mai nake, kama pa lo marohati, ale kama pa lo mařohu, nomam ruru la sopo řuhu, tamlohi la vailehilehi kamam, ale mo sopo te imamam. <sup>12</sup>Ale kama kalvono, kama voko na limamam, vara la veresatihi kamam, kama leřuhu hinira, ale vara la tipahi kamam, kama turu řilangi tarea, <sup>13</sup>vara la vereřesiřesi kamam, kama reti řuhu isara. Kama mai sohena, ale kama pa lo toho sohena utauta na varama, sohena tapahuri.

<sup>14</sup>Na sopo uli la hinau nike, matan vara a vai kamim ha mahanuhanu, pani vara a retiřoařohai kamim sohena natuku řuhuřuhu. <sup>15</sup>Matan hina purongo vara nomim tamlohi vujangi mo matuvana hin Křisto, tamamim mata rasua la tupu visaletē purongo. Matan enau na mai tamamim hin Křisto Iesu na Retiřuhu. <sup>16</sup>Ale matana, na lo usia řilangi isamim vara ha usuri na noku tovongi.

<sup>17</sup>Matan hinau sei natu, na pa řule Timothy natuku řuhuřuhu isamim, ale enia mo řomturu řilangi tarea hin Moli, i pa mai vara i mele vere kamim na noku posposi hin Křisto, i pa vujangi kamim sohen enau na lo vujangi na vao kalesia tari na jara tari.

<sup>18</sup>Tatuamim nake la lo mangisi tavera jea matan la lo řomřomia vara a pa sopo mele mai isamim. <sup>19</sup>Pani vara masalon Moli, a pa mele mai isamim vila, ale a pa vileiulia vara la tamlohi mangisi nike la lo vaore purongo teni vara nora suiha mo tai isan God. <sup>20</sup>Matan mauri atu God mo aulu hinia mo sopo turu na retireti nona tamlohi purongo, pani na suihan God. <sup>21</sup>Ka opoi na sava? A pa mai isamim peresi na hamim maja, teni a pa mai isamim peresi na opoia na posposi řomatano?

### Tau Nařihi Haratu Mo Hehe

**5** <sup>1</sup>Sorasora mo lo vano vara posposi maji mo lo toho isamim, ale posposi maji sei mo sopo te tamlohi řořoha i eři majinga hinia vara tea i eři vaia sohena, matan tamlohi matea mo lo lavi na naroun tamana, <sup>2</sup>ale kamim ka řomaulu pani řomimim mo sopo sati mata sava? Ha tau nařihi tamlohi atu mo lo vai posposi atu na livuhamim.

<sup>3</sup>Matan hina purongo vara na sopo toho peresi kamim nake, noku řomřomi mo lo toho isamim, na pete sile na talai moiso isan haratu sei mo vai posposi atu. <sup>4</sup>Vara ha matavuhi na hijan Moli Iesu, ale noku řomřomi i pa lo toho peresi kamim na suihan nořa Moli Iesu, <sup>5</sup>ha pa sile tamlohi nike na liman Setan matan vara i komo na epena, matan vara maurina i pa juri na rani aria non Moli.

<sup>6</sup>Nomim hapahapa mo sopo tataholo. Ka sopo levosahia vara ha tau na makomo isi na flaua, i pa vai na flaua i sosohi vevuhi? <sup>7</sup>Ha tau naŕihi na flaua tuai isi mo lo toho hinia, matan vara ha pa mai flaua paro, matan kamim ka flaua paro varaŕuhu. Matan la sile Kŕisto noŕa natu sipsip mata Passover, Kŕisto, enia malamalai atu mo mate mataŕa. <sup>8</sup>Mo ŕuhu vara ŕa matavuhi mata hanhani Passover, mo sopo peresi na flaua tuai isi mo lo toho hinia, isi atu enia posposi vaisatihi na tinapua, ale enia hina sasati, pani ŕa pa hani pereti atu mo sopo te isi hinia, pereti atu enia mauri vokevoke peresi na retivaraŕuhu.

### Hehe Na Lolo Vao Kalesia

<sup>9</sup>Na uliuli isamim moiso na noku leta vara ha pa sopo tapala peresi na tamlohi la lo vai na posposi maji, <sup>10</sup>na sopo ŕarami la haratu non varama la sopo tatuafā sei la lo vai na posposi maji, teni la haratu ŕomŕomi haŕivi mo lo vilira, teni la haratu la lo vavanaho, teni la haratu la lo lotulotu vono. Matan, vara na lo vereahohena, ha pa malue hin varama nike vara ha eŕi toho asau hinira. <sup>11</sup>Pani nakerihi na lo uliuli isamim vara ha sopo pulutahi peresi tea sei mo vereahohena vara mo vorai rasua vara mo jovi na posposi maji, teni na ŕomŕomi haŕivi, teni mo lotulotu vono, teni mo lo hiteŕesifesi na tinapua, teni mo lo putu na wai ŕilangi tarea, teni mo tamlohi halu, ale ha pa sopo sakele vara ha hanhani matavuhi peresi tea vara mo sohenahena.

<sup>12</sup>Matan mo sopo noku hinau vara a ari na tamlohi la sopo rasua. Pani enia nomim hinau mata ari la haratu na lolo vao kalesia. <sup>13</sup>God i pa ari la haratu la sopo tamlohi rasua ale mo vereahohena mara,

‘Ha tipahi naŕihi na tamlohi hehe sasati na livuhamim!’ *Deut 17.7; 19.19*

### Nomim Vauriuri

**6** <sup>1</sup>Vara te vonamim mo vauriuri peresi na vonamim matea, mo pa hiteahohena sava vara i vano isana tamlohi ari na jingoima, ale mo sopo taua na lima tapuhi non God? <sup>2</sup>Teni ka sopo levosahia vara tapuhi non God la pa ari na varama? Ale vara ha pa ari na varama, mo toma, ka sopo navu vara ha ari na nomim vauriuri vavarihi? <sup>3</sup>Ka sopo levosahia vara enŕa ŕa pa ari na angelo? Matan haratu, mata sava ka sopo eŕi tau na tamata na vauriuri vavarihi nike na varama? <sup>4</sup>Vara te hinau isamim mo sohenahena, mata sava natu, ka lo vano isana tamlohi varama, haratu sei mo sopo te nora hinau vara la eŕi reti matana na lolo vao kalesia? <sup>5</sup>Na lo vereahohena nike, vara a vai kamim ha mahanuhanu. Varaŕuhu, mo sopo tea na lolo vaomim kalesia vara mo sopo lo jea na lelevosahi vara i eŕi tau na tamata na vauriuri nona vorai kalesia? <sup>6</sup>Pani kamim, ka hiteahohena vara mo tataholo purongo vara te voraimim i tau na voraina kalesia tinapua matea na aria nona tamlohi varama!



<sup>7</sup>Ka lo vauriuri peresi kamim hasemim na naho tamlohi aria mata varama, enia mo vujangia mo memera moiso vara ka lo toho asau hin mauri atu God mo opoia. I pa mele řuhu vara ha tinařihi purongoia, i pa mele řuhu vara ha tinařihira la jeu kamim. <sup>8</sup>Pani kamim purongo kamim hasemim, ka lo vai na hehe isamim, ale ka lo haluhalu na voraimim kalesia!

### Ha Toho Asau Na Posposi Lumiha

<sup>9</sup>Ka sopo levosahia vara la haratu la lo vai na hehe la pa sopo eři lavi mauri atu God mo aulu hinia? Ha mera hinia, la haratu la lo vai na posposi viriu, teni la haratu la lotulotu vono, teni la haratu la lo vaivaileu peresi na tinapua, teni tamlohi la juruvi peresi na tamlohi teni hařai la juruvi peresi na hařai purongo, <sup>10</sup>teni tamlohi vavanaho, teni la haratu la lo řomusuri na hinau non te tinapua, teni la haratu la opoi jea na wai řilangi tarea, teni la haratu la lo veresatihi na tinapua, teni la haratu la lo uri na tamlohi mata vavanaho na nora hinau, enira mo isoiso atu la pa sopo lavi mauri atu God mo aulu hinia. <sup>11</sup>Ale tuai tatuamim ka sohena, pani nake God mo hoje nařihi na nomim hehe moiso, ale mo tapuhi kamim, mo vai kamim ka tataholo na nahon God na hijan Moli Iesu Křisto peresi na Tanumen nořa God.

### Hahau Mo Tataholo

<sup>12</sup>Hai la lo vereea lara, “Matan enau kalesia matea, mo tataholo purongo vara a usuri na masaloku tari.” Pani a eři vereea vara hinau tari la pa sopo eři tueni kamim, pani hina purongo vara, “Enau kalesia matea, mo tataholo purongo vara a usuri na masaloku tari.” A pa sopo tinařihia vara a toho na ruhuruhun te hinau hatea. <sup>13</sup>Ale hai la lo vereea vara, “Hanhani mo lo toho mata pangeřa, ale pangeřa mo lo toho mata hanhani!” Mo varařuhu pani ko hitea, God i pa komora enira mo rua. Epeřa mo sopo toho mata posposi viriu, mo vono! Epeřa la lo toho mata non Moli, ale Moli mo aulu na epeřa. <sup>14</sup>Ale God mo sauteterahi Moli na mateia, ale i pa sauteterahi na epeřa sohena na suihana. <sup>15</sup>Ka sopo levosahia vara epemim enira vonara matea na epen Křisto? Mo tataholo vara a lavi te vonara hatea na epen Křisto, ale a vaia i sořotahi isana hařai malele matea? I vonovono řuhu! <sup>16</sup>Teni ka sopo levosahia vara haratu mo sořotahi peresi na hařai malele matea mo mai epe matelete peresia? Matan sohen la ulia mo vereea vara, ‘Enira rua, la pa mai epe matelete’.

*Gen 2.24*

<sup>17</sup>Pani haratu sei mo sořotahi isan Moli, enia mo mai matelete peresi na Tanumena.

<sup>18</sup>Ha rovo asau na posposi viriu. Hina sasati tinapua tari tamlohi la lo vaira mo sopo komo na epena, pani haratu mo lo vai na posposi viriu mo

lo hase hehe na epena. <sup>19</sup>Teni ka sopo levosahia vara epemim enia temple non Tanume Tapu sei mo lo toho na lolomim sei God mo silea isamim? Ka sopo nomim hasemim, <sup>20</sup>matan sava God mo volituhu kamim hinia vara i juri kamim mo tavera jea. Ale na epemim tari ha vaira na posposi ŕuhu vara la tahe na hijan God i aulu.

### Vujangi Mata Lahi

**7** <sup>1</sup>Ale nakerihi, usuri na sava ka usia na nomim leta, ka usia vara, “Mo tataholo vara tamlohi la sopo juruvi peresi na haŕai teni mo vono?” Ale noku ŕarami nahai, <sup>2</sup>mo ŕuhu, pani matan posposi viriu mo maŕivi hajavua, i pa mele ŕuhu jea vara tamlohi matea i lahi, ale i lo toho peresi narouna purongo, ale haŕai matea i toho peresi tuana purongo. <sup>3</sup>Mo sopo tataholo vara tamlohi lahi matea i horo narouna vara mo opoia vara i juruvi peresia, matan mo tataholo vara i usia, ale narouna sohena i pa sopo horo tuana. <sup>4</sup>Haŕai lahi matea i sopo eŕi vai na sava tarea enia hasena mo opoia, matan tuana mo aulu na epena, ale tuana sohena i sopo eŕi vai na sava tarea enia hasena mo opoia, matan narouna mo aulu na epena. <sup>5</sup>Ha sopo horohoro kamim, pani matan te hinau purongo sohen harihi: vara engko peresi naroum ka majinga hinia matan vara ha hase tau kamim mata usiusi matan te makomo rani purongo. Pani vara mo isoiso, ha mele juruvi jara matea matan vara Setan i sopo eŕi vaihite kamim vara ha vano isana tinapua matan ka sopo eŕi hase taurilati kamim.

<sup>6</sup>Sava na lo vereea matana mo tataholo, pani enia mo sopo retileu matea. <sup>7</sup>Enau na opoia vara tamlohi tari la soheku, pani tatua tamlohi God mo vaira la tataholo vara la lahi, ale tatuara God mo vaira la tataholo matan la sopo lahi.

<sup>8</sup>Ale isan la haratu la sopo lahi teni la haŕai malepu, na vereea vara mo mele ŕuhu jea vara la sopo lahi soheku. <sup>9</sup>Pani vara la sopo eŕi hase taurilatira, mo ŕuhu vara la lahi. Matan enia mo mele ŕuhu jea vara la lahi mo jeua vara la sopo eŕi taurilati na masalo epera.

<sup>10</sup>Ale isan la haratu la lahi mo sopo enau na lo vereea pani Moli mo lo vereea vara, haŕai lahi i pa sopo rovo hin tuana, <sup>11</sup>pani vara i vaia, i pa sopo eŕi mele lahi, pani vara mo ŕohu hin ŕomŕomi atu, mo sopo te mele malele tinapua, i pa vai na tamata peresi tuana i mele mai isana, ale tamlohi lahi sohena i sopo ŕohu hin narouna.

<sup>12</sup>Isana tamlohi tinapua enau na lo vereea mo sopo Moli mo vereea vara te vorai kalesia hatea sei narouna mo sopo kalesia, pani ŕomina mo ŕilangi vara i toho peresi tuana, i pa sopo ŕohu hinia. <sup>13</sup>Vara te haŕai kalesia hatea tuana mo sopo kalesia matea, pani vara ŕomina mo ŕilangi vara i lo toho peresi narouna, narouna i pa sopo ŕohu hinia. <sup>14</sup>Matan God mo tapuhi na tamlohi mo sopo rasu matan narouna enia haŕai

kalesia matea, ale God mo tapuhi na hañai mo sopo rasu matan tuana enia tamlohi kalesia matea. Vara i vono, natumim la pa lumihia na nahon God, pani matan mo sohen haratu, enira la tapu na nahona. <sup>15</sup>Pani vara vonara matea sei na lahi mo sopo kalesia, ale mo rovo, ha tinañihia vara i sohena. Hin posposi sei vorai kalesia atu i sopo eñi tia hin lahi atu, matan God mo tovi kamim vara ha toho na tamata. <sup>16</sup>Hañai lahi, ko pa levosahia sohena sava vara o eñi juri tuam? Tamlohi lahi, ko pa levosahia sohena sava vara o eñi juri naroum?

<sup>17</sup>Mo řuhu vara tamlohi kalesia hatehateahi la toho hin mauri atu sohen Moli mo silea isara, hara sei God mo tovira matana, harihi enia noku retileu isana vao kalesia tari. <sup>18</sup>Vara tea mo taiřalihi tiroma moiso hin rani atu God mo pa tovia, i pa sopo vaihitea vara i vaitihai na hapila nona taiřalihi! Vara tea mo sopo taiřalihi hin rani atu God mo tovia, i pa sopo ale na taiřalihi! <sup>19</sup>Matan mo sopo te hinau hinia vara ko taiřalihi teni ko sopo taiřalihi, hina aulu enia vara ha ooloo na retileu non God.

<sup>20</sup>Mo řuhu vara tamlohi hatehateahi la lo toho hin mauri atu God mo tovira hinia. <sup>21</sup>Vara te vonamim mo lo slev hin pongi atu God mo tovia, i pa sopo řomřomi te hinau vara i pa lo toho sohena slev teni mo vono. Pani vara nona tamlohi tavera mo opoia vara i teria, mo řuhu vara i vano. <sup>22</sup>Matan hara sei Moli mo tovia na rani mo pa lo toho sohena slev matea, enia mo materi hin Moli, ale sohen haratu, haratu sei mo materi hin rani atu Moli mo tovia, enia mo slev non Křisto. <sup>23</sup>Volimim atu God mo volia mata juri kamim mo tavera jea, ha sopo mai slev nona tamlohi. <sup>24</sup>Ale la voraiku peresi na vevoraiku, na sava mauri vara God mo tovi kamim hatehateahi hinia, mo řuhu vara ha lo toho atu, ale God i pa toho peresiho.

<sup>25</sup>Ale isana kalesia sei la sopo lo lahi, na sopo lavi te retileu isan Moli matara, pani na sile na noku kilakilau sohena tamlohi matea sei Moli mo řomopoia, hinau sei ha eñi rasua. <sup>26</sup>Ale na řomiku na sava mauri mo lo toho nake, mo řuhu vara haratu mo lo toho na sava mauri, i lo toho hinia. <sup>27</sup>Vara ko lahi moiso, o sopo rovo hin naroum. Vara ko sopo lo lahi, mo mele řuhu jea vara o sopo aleale naroum. <sup>28</sup>Pani vara ko lahi, ko sopo vai na hehe, ale vara te hañai matea la tapuhoroa moiso mo lahi, mo sopo vai na hehe. Pani la haratu la lahi la pa lavi na rani řilangi matana, na vere matan na opoia vara a horo kamim na rani řilangi mata lahi.

<sup>29</sup>La voraiku peresi na vevoraiku, řarami noku reti mo sohen harihi: rani sei God mo taua matan varama nike mo vejuveju sati moiso. Ale matana, mo tapulo nake, la haratu sei naroura, la pa toho sohena mo sopo te naroura, <sup>30</sup>ale la haratu sei la lo tangtangi la pa vaia sohena la sopo tangtangi, ale la haratu sei la lo avulahi, la pa vaia sohena la sopo avulahi, ale la haratu sei la lo volvoli, la pa sopo taurilati na sava la volia, <sup>31</sup>ale la haratu la lo vai na voko hin varama nike, la pa sopo tia

hin varama nike, matan varama nike mo lo vano vara i tihai. <sup>32</sup>Na opoia vara řomimim la sopo tiatia na hina tinatinapua matuvana, matan haratu mo sopo lo lahi i pa eři tau na řomina na vavahinau non Moli vara i pa vai Moli i avulahi hinia. <sup>33</sup>Pani tamlohi atu mo lahi moiso, mo lo tau na řomina na hinahinau mata varama matan vara i pa vai narouna i avulahi hinia, <sup>34</sup>ale řomina mo lo masanga, ale hařai mo sopo lo lahi, teni hařai la tauhoroa moiso vara i pa lahi, enira la tau na řomira na vavahinau non Moli vara la pa hahau na mauri vokevoke na epera peresi na řomira. Pani hařai atu mo lahi moiso mo lo tau na řomina na hinahinau mata varama mata i vai tuana i avulahi hinia.

<sup>35</sup>Na lo retireti sohena vara a tueni kamim, mo sopo matan vara a horo kamim hin te hinau, pani vara hinau tari isamim la pa maro tataholo, moiso vara i vai na řomimim i řilangi isan Moli matan vara i sopo masanga. <sup>36</sup>Vara tea isamim mo lo hase tapuhoroa vara i sopo lahi isan tapalana, ale nake mo řomřomia vara mo sopo řomřomi řuhu natu, ale vara řomina mo řilangi vara i lahi, ha tinařihia vara i vaia sohena, ha tinařihira vara la lahi, enia mo sopo vai na hehe. <sup>37</sup>Pani haratu sei řomina mo řilangi vara i hase tapuhoroa na lahi, mo sopo matan te hinau tinapua, pani matan mo hase eři taurilatia, ale vara řomina mo turu řilangi hinia, mo lo řuhu purongo vara i sopo lahi. <sup>38</sup>Ale matana, haratu mo lahi isan tapalana, enia mo vai na hina řuhu matea, ale isan haratu mo lo hase tapuhoroa na lahi, mo vai na hinau mo mele řuhu jea.

<sup>39</sup>Hařai lahi matea mo lo toho na ruhuruhun tuana i tikeli rani atu tuana mo mate. Pani vara mo mate, enia mo materi vara i eři mele lahi vara mo opoia, pani isana tamlohi kalesia matea purongo. <sup>40</sup>Pani na noku kilakilau, hařai malepu atu i pa mele avulahi jea vara i lo toho hasena purongo. Ale na levosahia vara enau na lo usuri na řomin Tanumen God matana.

### Hanhani La Silea Isana Tamasi

**8** <sup>1</sup>Ale nakerihi na opoia vara a mele retireti makomona na hinau matea na nomim leta sei mata hanhani sei tamlohi la silera isana tamasi moiso. Enřa mo isoiso řa levosahia vara: Enřa řa lavi na lelevosahi. Pani ‘lelevosahi’ sei la lo vereva mo lo vai na tamlohi la řomaulu, pani opoia mo lo vai na tamlohi la ulua na posposi řuhu. <sup>2</sup>Vara tea, řomina mo řomřomia vara mo levosahi te hinau, tamlohi atu mo sopo lo levosahi te hinau na sava vara i pa levosahia. <sup>3</sup>Pani vara tea mo opoi God, God mo levosahi tamlohi atu.

<sup>4</sup>Matan haratu, na řomřomi mata hani na hanhani sei la silea isana tamasi, řa levosahia vara tamasi la sopo mauri, ale řa levosahia vara mo sopo te God tinapua, pani matelete purongo. <sup>5</sup>Matan hina purongo vara hinau hai na tuka teni na varama la tovira god la lo toho, varařuhu god

matuvana peresi na moli matuvana la lo toho, <sup>6</sup>pani isaña, God mo matelete enia Tamaña, hinau tari la tai isana, enira mo isoiso nona, ale Moli matelete enia Iesu Křisto, ale hinia, hinau tari la pala, ale hinia, enña řa lo mauri.

<sup>7</sup>Pani, mo sopo tamlohi tari la lavi lelevosahi nike. Pani matan tamlohi kalesia hai tiroma la lo pulutahi peresi na tamasi moiso vara la hani na hanhani la silea isana tamasi moiso, la pa řomřomia vara la lo vai na hehe, ale la pa rongoa vara la lumiha matana. <sup>8</sup>Pani hanhani i sopo eři vaiřa řa tataholo na nahon God. Řa sopo eři vejuveju hin te hinau vara řa sopo hania, ale vara řa hania i pa sopo eři tueniřa. <sup>9</sup>Pani ha lo kilau i řuhu vara nomim materi sohen harihi i sopo vai te voraimim kalesia hatea i jovi matan řomina mo sopo lo řilangi hinia.

<sup>10</sup>Matan, vara tea řomina mo sopo lo řilangi mo hiteho ko lo hanhani na lolo temple nona tamasi matea, ale ko sopo levosahia vara nomim materi sei i pa vai tamlohi atu mo sopo lo řilangi vara i hani hanhani atu la silea isana tamasi moiso i pa jovi? <sup>11</sup>Ale matan nom lelevosahi sei, voraim kalesia sei řomina mo sopo lo řilangi, i pa jovi nařihi na nona rasua, vorai sei Křisto mo mate matana. <sup>12</sup>Ale matana, ko lo vai na hehe isan Křisto vara ko lo řuleřule te vorai kalesia tinapua hin te hinau la rasua vara mo sopo tataholo. <sup>13</sup>Matan haratu vara te hanhani na lo hania mo vai te voraiku kalesia mo jovi, a pa sopo eři mele hani mit atu vara i vai voraiku kalesia atu i jovi matana.

### Mauri Nona Vahařule Tataholo Matea

**9** <sup>1</sup>Enau mo sopo tamlohi materi matea? Teni enau mo sopo vahařule matea? Enau mo sopo haratu sei mo hite Iesu nořa Moli na matakū? Kamim mo sopo noku vua vavahinau hin Moli? <sup>2</sup>Vara isana tinapua enau mo sopo vahařule matea, pani isamim, enau vahařule matea, matan kamim ka mai kalesia mata noku vua vavahinau, ale mo vujangia vara enau tamlohi vahařule non Moli.

<sup>3</sup>Hinau sei enia noku řarami isan la haratu la lo aleau mata noku vavahinau. <sup>4</sup>Ka řomi vara mo sopo tataholo vara ha vahani kamam? <sup>5</sup>Ka řomi vara mo sopo tataholo vara kama lavi na naroumam sei la kalesia la usuri kamam, sohen la vahařule tinapua sei la lo vaia, ale sohen tasin Moli peresi Peter la lo vaia? <sup>6</sup>Teni, enia matan enau Barnabas purongo vara mo sopo tataholo vara kama isoiso na nomam voko mata mania? <sup>7</sup>Sava tamlohi vuro mo lo hasena volia? Sava tamlohi isa mo lavo na isa matea, ale mo sopo hani te vuana? Teni hare mo lo korohi te nani pani mo sopo inu te wai susuna?

<sup>8</sup>Ka řomi vara na lo vere la hinau nike usuri na noku řomřomi purongo? Ka řomi vara leu mo sopo vereahena? <sup>9</sup>Matan la ulia na Leu non Moses moiso, vara ‘O sopo pesihoro na jingo buluk vara mo lo varasi nařihi na piri wit’.

*Deut 25.4*

Ka ñomi vara God mo lo ñomñomi na buluk purongo? <sup>10</sup>Ka ñomi vara mo sopo vere reti sei mataña? La ulia mataña, matan haratu mo lo ñule na lepa mo lo ñule na nona ñomtau, ale haratu mo lo pete na piri wit mo lo petera na nona ñomtau vara i pa lavi na ñungana hin la piri wit atu?

<sup>11</sup>Vara kamam vahañule kama lo lavo na piri ñuhu mata mauri isamim, ka ñomi vara mo sopo tataholo vara kama lavi te hinau mata i tueni na maurimam nake isamim? <sup>12</sup>Vara tinapua la opoia vara la lavi na ololo isamim, ka ñomi vara kamam mo sopo tataholo vara kama lavia i jeu na vahañule tinapua? Hina purongo, kama sopo ngurunguru hin kamim vara ha sile na ololo isamim, pani kama hitea vara i pa mele ñuhu jea vara kama sopo mele tau te hinau i vai kamim ha tialahalaha hinia, ale ha ñohu na Retiñuhu non Kñisto matana.

<sup>13</sup>Kamim ka sopo levosahia vara la pñis atu la lo kilau na Temple nona Jew, la lo lavi na hara hinau na hanhani mata silesilea nona tamlohi? Ale ka sopo levosahia vara pñis sei la lo volitusi na votavota mata malamalai atu la lo asease na silesilea mata malamalai? <sup>14</sup>Hin malele akerihi natu, Moli mo retileu hinia vara la haratu la lo vereuli na Retiñuhu non Kñisto la pa lavi na hara hinau mata nora vavahinau na Retiñuhu.

<sup>15</sup>Mo tataholo vara a usi kamim vara ha tueniau, pani na sopo usia. Na sopo uliuli isamim nake vara a usia isamim. Mo vono. I pa mele ñuhu isaku vara a mate i jeua vara a usi kamim mata nomim tuetueni! <sup>16</sup>Vara a lo retivujavujangi na Retiñuhu, mo sopo sile te masapa isaku vara a pa mangisi matana. Matan God mo taua na limaku vara a pa vaia. Rani sati i pa mai isaku vara a sopo retivujavujangi na Retiñuhu.

<sup>17</sup>Vara na lo vaia usuri na masaloku a pa lavi na noku otori matana, pani God mo viñoniau, ale mo sileau hin voko tapu nike, ale enau, a sopo eñi vai te hinau tinapua. <sup>18</sup>Sava natu enia noku otori? Enia masapa vara a retivujavujangi purongoi na Retiñuhu, ale na sopo usi na sava sei mo tataholo mata tamlohi retivujavujangi na Retiñuhu matea i eñi lavia.

<sup>19</sup>Matan hina purongo vara enau tamlohi materi, na sopo toho na ruhuruhun tea, pani na hase vaiau vara a volitusi isana tamlohi tari vara a pa eñi lavi te vaora isara la mai isan Kñisto.

<sup>20</sup>Isana Jew, na mai sohena Jew matea matan vara a lavi na Jew la mai isan Kñisto. Isan la haratu la lo toho na ruhuru leu, na mai isara sohena tamlohi matea sei mo lo toho na ruhuru leu, pani na sopo toho na ruhuru leu matan vara a lavi la haratu la lo toho na ruhuru leu la mai isana. <sup>21</sup>Isan la haratu la sopo toho na ruhuruhun te leu, na mai sohena tamlohi matea mo sopo toho na ruhuruhun te leu, mo sopo vara na sopo toho na ruhuru leu non God, pani na lo toho na ruhuru leu non Kñisto, matan vara a eñi lavi la haratu la sopo toho na ruhuruhun te leu la mai isan Kñisto.

<sup>22</sup>Isan la haratu la sopo lo ñomñilangi na retivarañuhu, na mai sohera, matan vara a lavi la haratu la sopo lo ñomñilangi la mai. Isana tamlohi

tari tinatinapua na mai sohera na malelera tari matan vara a efi juri tea. <sup>23</sup>Na lo vai la hinau tari sei mata Retiřuhu purongo, matan vara hinira enau peresira a pa efi lavi na hina řuhuřuhu sei Retiřuhu mo retitauhi hinira.

<sup>24</sup>Korong ka levosahia vara na rani maromaro matea, tamlohi maromaro tari la maro, pani tamlohi matelete purongo i pa mai tiroma. Ale matana, ha maro matan vara ha efi mai tiroma. <sup>25</sup>Tamlohi maromaro hatehateahi tari, la tau na řomira vara la hase taurilatira na hinahinuu matuvana. La lo vaia matan vara la efi lavi na řongořongo rau vipahai purongo sei i pa řovo. Pani enřa, řa lo vaia matan vara řa pa lavi na hinuu i pa sopo efi řovo. <sup>26</sup>Matan hinuu sei, enau na sopo maromaro purongo; na sopo tutuhi sohen tamlohi matea mo lo tutuhi purongoi na masapa. <sup>27</sup>Pani na lo taurilati na epeku, ale na aulu hinia matan vara i vono, hitahu na noku retivujavujangi isana tinapua, enau haseku purongo na mele tau nařihiau na noku vujangi.

### Rongorongo Vono Nona Tavtavuin Israel Tuai

**10** <sup>1</sup>La voraiku peresi na vevoraiku, na opoia vara ha levosahia vara tamařa la lo toho na ruhuruhun telangi atu, ale enira mo isoiso la hahau roto na tasi hin masapa atu God mo vaia, <sup>2</sup>ale enira mo isoiso la mai tamlohi usuri non Moses ale la paptijo hinia hin telangi atu ale hin tasi atu, <sup>3</sup>enira mo isoiso la hani hanhahi atu God mo silea, <sup>4</sup>enira mo isoiso la inu hin wai atu God mo silea. Matan la inu hin vatu mauri atu sei mo lo usurira, ale vatu atu enia Křisto. <sup>5</sup>Pani God mo sopo avulahi na sope vaora tavera, matan God mo vilimateira, ale mo pla hau na tarapera na jara hasetoho atu.

<sup>6</sup>La hinuu sei la masese sohena tovongi matea isařa, matan vara řa pa sopo opoi na hina sasati sohera. <sup>7</sup>Ha pa sopo lotulotu vono sohena tatuara la lo vaia tuai, sohen la ulia moiso vara, ‘Tamlohi la sakele vara la hanhahi, la inu, ale hitahu, la turu la velu’. *Exo 32.6* <sup>8</sup>Řa pa sopo usuri na posposi maji sohena tatuara sei la lo vaia tuai, rani matelete purongo vao sei la mate, evira mo tikeli tari vaha ngavulu rua mo tolu (23,000). <sup>9</sup>Řa sopo vaihite Moli sohen la tatuara atu la lo vaihitea tuai sei ale mata la hati matemateira, <sup>10</sup>teni řa sopo reti vavarihi sohen la tatuara atu la lo vaia tuai, ale angelo mata mateia mo vilimatemateira. <sup>11</sup>La hinuu sei la mai isara tuai sohena tovongi matea isařa, ale la ulira mata retiřoaoahai isařa nake, enřa sei řa lo toho na pongi hitahu.

<sup>12</sup>Matan haratu, sava tamlohi mo lo řomřomia vara enia mo lo turu řilangi, i lo kilau mamahunia vara i sopo jovi sohera. <sup>13</sup>Mo sopo te vaihite hatea vara ko jovi hinia mo tinapua hin la haratu la lo tikeli na tamlohi tari. God mo lo turu řilangi tarea, ale i pa sopo tinařihia vara te hinuu hatea i vaihite kamim i jeu na vaihite sei ha efi horora, pani hin

vaihite atu God i pa sile te malele mata rovo hinia matan vara ha pa eñi jelu hinia.

### Leřuhu Non Moli Na Hanhani Tapu

<sup>14</sup>Matan hinau sei, la voraiuku řuhuřuhu, ha rovo na lotulotu vono. <sup>15</sup>Noku reti mo lo vano isana tamlohi la tamlohi tapurongo, ha ari na sava na lo vereea isamim. <sup>16</sup>Paniken mata leřuhu non God sei řa lo vere meje isana matana, enia matan vara enřa mo isoiso řa eñi lavi na leřuhu na řaen Křisto hinia. Ale pereti atu řa lo topea, enia matan vara enřa mo isoiso řa eñi lavi na leřuhu na epen Křisto hinia. <sup>17</sup>Matan pereti atu enia pereti matelete purongo, enřa sei řa vao matuvana, řa mai epe matelete, matan enřa mo isoiso řa hani na pereti matelete purongo. <sup>18</sup>Ha to řomřomi na tavgavuın Israel. Ka hitea vara la haratu sei la lo hani na malamalai, la sopo mai matelete matana?

<sup>19</sup>Ka řomi vara na lo vere na sava? Na sopo vereea vara tamasi teni te hanhani sei la silea isara enira hinau purongo. <sup>20</sup>Mo vono! Na lo vereea vara malamalai atu tamlohi řořoha la lo silea, la lo silea isana tanume sasati, mo sopo isan God. Na sopo opoia vara kamim ha matavuhi peresi na tanume sasati. <sup>21</sup>Ha sopo eñi inu na paniken non Moli, ale ha inu na paniken nona tanume sasati! <sup>22</sup>Mo toma? Mo tataholo vara řa vaivai Moli i lolokoru? Ka řomi vara enřa řa řilangi řa jeu Moli?

### Materi Nona Kalesia

<sup>23</sup>Tamlohi hai la lo vereea lara, “A eñi vai na hinau tari na opoia!” Mo řuhu pani hinau tari la pa sopo řuhu hiniho ale hai lara, “A eñi vai na hinau tari na opoia!” Mo řuhu pani hinau tari la pa sopo tueniho vara o ulua. <sup>24</sup>I pa sopo tea i řomřomi na sava mo řuhu isana purongo. Ha řomřomi na tinapua, ale sava i pa řuhu isara.

<sup>25</sup>Ha hani na mit la ařehira na jara maket, i sopo te retiusia vara la silea isana tamasi moiso teni mo vono matan vara řomimim i sopo řomkaka hinia. <sup>26</sup>Matan Retitapu mo vereea vara, ‘Varama enia non Moli, ale hinau tari la lo toho hinia enira nona’.

*Psa 24.1*

<sup>27</sup>Ale vara te tamlohi řořoha mo tovi kamim vara ha hanhani peresia, ale ka avulahi vara ha vano, ha hani na sava hinau la taua na nahomim, i sopo te retiusia hinira vara la tataholo vara ha eñi hanira teni mo vono. <sup>28</sup>Pani vara tea mo vereea isamim vara, “Hinau sei la silea sohen malamalai moiso!” vara mo sohena, ha sopo hania matan enia mo vere kamim hinia, ale matan vara i sopo komo te řomina. <sup>29</sup>Pani na sopo vere na řomimim, pani řomin tamlohi atu. Matan mata sava natu, noku materi i pa isoiso mata řomřomi non te tinapua? <sup>30</sup>Vara na lavia peresi na vere meje isan God, mata sava natu, tea la eñi tuvaiau matan hinau sei na vere meje matana moiso?



<sup>31</sup>Ale matana, sava ka hania teni ka inua teni ka vaira, ha vaira matan vara hasohaso i pa vano isan God matana. <sup>32</sup>Ha sopo vai te hinau mata vaivai na Jew, teni na tamlohi řořoha teni isana vao kalesia non God, <sup>33</sup>sohen enau sei na vaihitea vara a vai na tamlohi tari la avulahi na hinau tari sei na lo vaira. Na sopo vaia mata i pa řuhu isaku, pani na lo alea vara a vaia i tueni na tamlohi matuvana matan la pa eři juri.

### Vujangi Mata Tamlohi Peresi Na Hařai

**11** <sup>1</sup>Ha usuri na noku tovongi sohen enau na lo usuri na tovongi non Křisto.

<sup>2</sup>Ale nakerihi, na lo hasohaso kamim matan ka lo řomřomiau na hinau tari, matana ka lo tauri mamahuni na mauri kalesia, sohen enau na lo vujangi kamim hinia. <sup>3</sup>Pani na opoia vara ha pa levosahia vara patu hařai lahi matea enia tuana, patu lamane tari enia Křisto, ale patun Křisto enia God. <sup>4</sup>Lamane tari sei la ropoi na patura, ale vara la lo usiusi teni la lo retimangovi, enira la lo vai mahanuhanu na patura sei, enia Křisto. <sup>5</sup>Pani hařai lahi tari sei, vara la sopo ropoi na patura ale la lo usiusi teni la lo retimangovi, enira la lo vai mahanuhanu na patura sei tuara, mo sohena vara la hiripilopiloia.<sup>c</sup> <sup>6</sup>Vara hařai lahi matea mo řohu vara i ropoi na patuna, mo řuhu vara i tai na vuluna i vejuveju. Pani matan enia hina mahanuhanu matea vara te hařai lahi i tai na vuluna teni la hiripilopilo na patuna, mo řuhu vara i ropoi na patuna. <sup>7</sup>Matan mo sopo tataholo vara lamane matea i ropoi na patuna, matan enia niniun God, enia mo lo vujangi na řuhuřuhun God, pani hařai enira la vujangi na řuhuřuhu nona tamlohi. <sup>8</sup>Matan God mo sopo vai na lamane na hařai, pani mo vai na hařai na lamane. <sup>9</sup>Ale mo sohena purongo, God mo sopo vai na lamane mata hařai, pani hařai mata lamane. <sup>10</sup>Matan haratu natu, mo řuhu vara hařai la ropoi na patura sohena matamata matea mo vujangia vara la lo toho na ruhuruhi suiha tinapua, matan angelo la lo kilau matana.

<sup>11</sup>Pani na vao kalesia non Moli, hařai mo sopo matan i toho hasena, teni tamlohi i toho hasena, <sup>12</sup>matan God mo vai na hařai na lamane, ale nake lamane mo vora isan hařai, ale hinau tari la tai isan God.

<sup>13</sup>Kamim hasemim ka hitea vara mo tataholo vara hařai matea i usiusi isan God, ale i sopo ropoi na patuna? <sup>14</sup>Mauri mo sopo vujangi kamim moiso i mera vara lamane matea vuluna mo peravu, enia hina mahanuhanu isana? <sup>15</sup>Pani vara vulu hařai mo peravu, enia hina řuhuřuhun hařai atu teni mo vono? Matan God mo sile na vuluna mata ropoi na patuna. <sup>16</sup>Vara tea řomina mo sopo opoi hinau sei, pani mo sohen haratu natu isamam peresi na lolo vao kalesia non God.

<sup>c</sup> 11.5 La lo hiripilopilo na hařai sohena tuai matan la tope na nora retitauhi mata lahi.

### Posposi Tataholo Mata Hanhani Tapu

<sup>17</sup>Pani sava a pa vere nakerihi, na sopo hasohaso kamim matara, matan ka lo pulutahi jara matea, enia mo sopo matan ha pa vai te hinau i mele ŋuhu, pani ka vaia mo mele sati jea sivo. <sup>18</sup>Matan tiroma hinau na rongoa, enia vara ka lo pulutahi mata lotu ale patumasa mo lo toho isamim. Ale na rongoa vara mo varaŋuhu, <sup>19</sup>matan ŋa levosahia vara patumasa la pa vora isamim, matan vara i memera vara hare nakonako isamim la jea na mauri rasua.

<sup>20</sup>Matan ka lo pulutahi jara matea, mo sopo hanhani tapu sei ka lo hania. <sup>21</sup>Matan, na nomim hanhani, tamlohi hatehateahi la hasera hani na hara hinau. Matea mo marohati, ale tinapua mo drong! <sup>22</sup>Mo toma? Mo sopo te imamim vara ha eŋi hanhani teni ha inu hinira? Teni ka lo hitelehilehi na vao kalesia non God, matan ka vai la haratu mo sopo te nora hinau la mahanuhanu? Na sopo levosahia vara a pa vere na sava isamim! Ka ŋomi vara a pa hasohaso kamim matana? Mo vono!

### Isoiso Hanhani

(Mt 26.26-29; Mk 14.22-25; Lk 22.14-20)

<sup>23</sup>Matan sava na silea isamim na lavia isan Moli. Hin vutepongi atu sei Judas mo turuposi hinia, Moli Iesu mo lavi na pereti, <sup>24</sup>ale mo vere meje matana moiso mo topea mo vere mara, “Harihi enia epeku sei na silea matamim. Ha vai harihi ŋomŋomi na sava na vaia matamim.” <sup>25</sup>Mo mele vaia sohena purongo na isoison hanhani atu, enia mo lavi paniken atu, mo vere mara, “Harihi enia retitauhi paro na ŋaeku. Vara ha inua, ha vai harihi ŋomŋomi na sava na vaia matamim.” <sup>26</sup>Matan sava rani ka lo hani pereti atu, ale ka inu hin paniken atu, ka lo vujangi na mateia non Moli, ale ha lo vaia sohena i tikeli na rani i mele mai hinia.

<sup>27</sup>Sava tamlohi vara mo hani pereti atu teni mo inu hin paniken atu non Moli na malele matea mo sopo tataholo, enia mo lo vai na hehe matan mo lo kilau purongoi na epen Moli peresi na ŋaena. <sup>28</sup>Tamlohi hatehateahi hasera la pa kilau usurira matan te hehe na maurira la pa vahaŋi hinia, moiso la pa eŋi hani pereti atu, ale la inu hin paniken atu. <sup>29</sup>Matan, vara tea mo hani teni mo inu, pani mo sopo ŋomŋomi na kalesia tinapua, enia mo hase hani teni mo inu na nona talai.<sup>d</sup> <sup>30</sup>Hinau sei natu, mo vai kamim matuvana mo sopo te suihamim, ale ka rojo, ale hai la mate.

<sup>31</sup>Pani vara ŋa haseŋa kilau usuri mamahuniŋa, God i pa sopo ariŋa matana. <sup>32</sup>Pani vara Moli i ariŋa, mo vaia matan vara i vai tataholoŋa matan vara ŋa pa sopo lavi na talai peresi na tamlohi tinapua na varama

<sup>d</sup> 11.29 Mt 5.23-26

na pongi hitahu. <sup>33</sup>Matana, la voraiuku peresi na vevoraiku, vara ha pulutahi mata hanhani tapu, ha saovi kamim hatehateahi. <sup>34</sup>Vara tea mo marohati, i pa hanhani na ima purongo, matan vara ka pulutahi, i sopo mata lavi na talai. Ale mata hinau tinatinapua a pa vere na malelera tataholo isamim vara a mai.

### Silesilea Non Tanume Tapu

**12** <sup>1</sup>Ale nakerihi, la vorai peresi na vevorai, enau na opoia vara ha mera na hinau sei Tanumen God mo lo silera. <sup>2</sup>Ka levosahia vara hin pongi atu ka lo toho na řořoha, suihan Tiapolo mo lo tikauleji kamim usuri na malele mo tiroman kamim ka vano isana tamasi mengo. <sup>3</sup>Matan haratu, na opoi vara ha levosahia vara mo sopo te tamlohi mo lo reti na suihan Tanumen God, i eři vereahi hin te rani vara, “Na lesati hin Křisto!” Moiso i sopo tea i eři vereahi, i vara “Iesu enia Moli!” vara Tanume Tapu mo sopo toho isana.

<sup>4</sup>Ale, otori tinatinapua matuvana la lo toho, pani pulora matelete purongo, enia Tanume Tapu. <sup>5</sup>Ale vavahinau mata tuetueni tinatinapua matuvana, pani Moli matelete purongo; <sup>6</sup>ale malele mata vavahinau tinatinapua mo matuvana, pani God matelete purongo sei mo lo voko hinira hatehateahi. <sup>7</sup>Tanume Tapu mo vuhesi na suihana isara hatehateahi mata tueni na tinapua.

<sup>8</sup>Isana tamlohi matea, Tanume Tapu mo silea na retireti mata lelevosahi, ale isana tinapua mo sile na retireti mata levosahi matan te hinau. <sup>9</sup>Isana tinapua pa Tanume Tapu atu mo sile na rasua, ale isana tinapua mo sile na otori mata na vai rojia i tihai, <sup>10</sup>isana tinapua suiha mata vai na hinau mařurahi, isana tinapua retimangovi, isana tinapua eři mata eři hitevosahi na sava tanume enia pulo retireti matea, isana tinapua i eři retireti na leo tinatinapua, isana tinapua i eři rongovosahi na leo tinatinapua.

<sup>11</sup>Enia pa Tanume Tapu atu sei enia hasena mo lo aseasehi la otori sei. Enia hasena mo hatihia vara sava tamlohi i pa lavi na sava otori.

<sup>12</sup>Matan epe tamlohi matea enia matelete, ale tavitavaluna matuvana, ale tavitavaluna matuvana pani la vai na epe matelete, mo sohen harihi peresi Křisto. <sup>13</sup>Matan hin Tanume Tapu matelete purongo, enřa mo isoiso řa paptijo na epe matelete, vara tamlohi řořoha teni Jew, slev teni tamlohi materi, mo vaiřa enřa mo isoiso vara řa inu isana Tanume Tapu matelete purongo.

<sup>14</sup>Matan epe tamlohi, tavaluna mo sopo matelete purongo, pani matuvana. <sup>15</sup>Vara palona i vereahi vara, “Enau na sopo tavalu epe matea matan enau na sopo limana!” řomřomi sohena haratu mo sopo vaia vara enia mo sopo tavalu epe matea. <sup>16</sup>Vara perona i vereahi vara, “Enau na sopo tavalu epe matea, matan enau na sopo matana!” řomřomi sohen

haratu mo sopo vaia vara enia mo sopo tavalu epe matea. <sup>17</sup>Vara tavalu epe tari enira matana matea i pa rongo te hinau na savana? Vara tavalu epe tari enira perona matea, i pa ngusahi te hinau na savana?

<sup>18</sup>Pani mo sohen haratu natu, God mo tau mamahuni na tavalu epe tari na jarara usuri na masalona. <sup>19</sup>Vara enira mo isoiso tavaluna matelete purongo, epena i pa toho epu? <sup>20</sup>Pani mo sohen haratu natu, tavitavaluna matuvana, pani epe matelete. <sup>21</sup>Matam i sopo eři vereea isana limam vara, “Ko sopo řuhu matan te hinau!” teni vara patum i vereea isana palom vara, “Ko sopo řuhu matan te hinau.”

<sup>22</sup>Varařuhu, la tavalu epe atu sei ka lo hitera vara la sopo řilangi teni la sopo řuhu, pani nora vavahinau la aulu jea mata tueni na epe, <sup>23</sup>ale la tavalu epe atu ka lo řompurongo hinira, enira pa la haratu sei ka lo ru mamahunira matan vara tea i pa sopo eři hitera, <sup>24</sup>pani tatua tavalu epe řa sopo řomřomia vara řa rurura sohera. Pani God mo vai na epe na malele matea vara řa sile na ooloo isana tavalu epe sei řa hitera vara la sopo eři lavi te ooloo. <sup>25</sup>Mo vaia matan vara la sopo patumasa na epe, pani vara tavitavalu epe tari atu la kilau mamahuni na tatuara tinatinapua. <sup>26</sup>Vara te tavalu epe hatea mo rongohaji, enira mo isoiso la rongohaji. Vara tavalu epe matea mo lavi na ooloo, enira isoiso la avulahi matana.

<sup>27</sup>Ale kamim epen Křisto, ale kamim hatehateahi ka tavitavaluna. <sup>28</sup>Ale God mo viřoni na tamlohi mata vavahinau na lolo vao kalesia sohen harihi:

tiromara enia vahařule,  
haruana enia přovet,  
hatoluna enia tamlohi vujangi mata reti non God,  
moiso la haratu la lo vai na hinau mařurahi tavera,  
moiso la haratu la lo vai na rojoa la tihai,  
moiso tamlohi tueni,  
moiso tamlohi tiroma na vavahinau,  
moiso mata retireti na leo tinatinapua.

<sup>29</sup>Enira mo isoiso la vahařule teni mo vono? Enira mo isoiso la přovet teni mo vono? Enira mo isoiso la tamlohi vujangi teni mo vono? Enira mo isoiso la eři vai na hina mařurahi tavera teni mo vono? <sup>30</sup>Enira mo isoiso la eři vai na rojoa i tihai teni mo vono? Enira mo isoiso la eři retireti na leo tinatinapua teni mo vono? Enira mo isoiso la eři vereuli na řarami leo tinatinapua teni mo vono? Mo vono!

### Opoia Mo Aulu Na Hinahinau Tari

<sup>31</sup>Pani ha tau na řomimim mata otori la mele aulu hinira. Ale enau a pa mele vujangi kamim na malele tinapua matea mo řuhuřuhu jea.

### Opoia Mo Aulu Jea

**13** <sup>1</sup>Vara a eři reti na leo nona tamlohi tinatinapua, teni na leo nona angelo na tuka, pani vara mo sopo te opoia isaku, enau na

lo vaore purongo sohena belo sei mo lo tangi teni mo lo kolekole roro purongo. <sup>2</sup>Vara a lavi na suiha mata retimangovi, ale a levosahi na hina luhu tari peresi na lelevosahi tari, ale vara noku rasua mo řilangi vara a eři juhati te vutivuti, pani vara mo sopo te opoia isaku, enau hina purongo matea. <sup>3</sup>Vara a lo sile na noku hinau tari isana tinapua, teni vara a sile na epeku vara la sulimateia, pani vara i sopo te opoia isaku, enau na sopo řuhu hin te hinau.

### Opoia

- <sup>4</sup> Opoia na mauriřa mo sohen harihi:  
 Opoia enia řomperavu, ale enia řomřuhu.  
 Opoia mo sopo mereimerei,  
 teni mo sopo retihapahapa.
- <sup>5</sup> Opoia enia mo sopo vai na hina mahanuhanu na naho tamlohi.  
 Opoia enia mo sopo opoi na masalona purongo.  
 Opoia enia mo sopo lolokoru vila.  
 Opoia enia mo sopo evi na hehe nona tinapua isana.
- <sup>6</sup> Opoia enia mo sopo avulahi na posposi hehe,  
 pani mo avulahi na retivarařuhu.
- <sup>7</sup> Opoia enia mo tatamahu mata hina řilangi tari.  
 Opoia enia mo lo kilau mata hina řuhu purongo.  
 Opoia enia řomřilangi mata hina řuhu la pa mai.  
 Opoia enia turu řilangi tarea.
- <sup>8</sup> Opoia, i pa sopo te isoisona hin te rani pani retimangovi la pa tihai, leo tinatinapua la pa isoiso, ale lelevosahi la pa tihai.
- <sup>9</sup> Matan enřa řa levosahi makomona purongo, ale řa lo retimangovi makomona purongo, <sup>10</sup> pani vara haratu sei mo sopo vejuveju hin te suiha hatea i pala, řa pa sopo mele opoi la hinau sei řa lo vejuveju hinira nake, matan la pa tihai.
- <sup>11</sup> Hin pongi atu na lo natirihi, na retireti sohena natirihi. Na lo řomřomi sohena natirihi, noku kilakilau mo sohena natirihi. Hin pongi atu na mai tamlohi, na tau nařihi na posposi nona natuvarihi. <sup>12</sup> Matan nake nořa kilakilau mo pa lo vusovusoha, pani na pongi hitahu nořa kilakilau i pa mera i řuhu. Nake na lo levosahi na makomona purongo, pani hitahu a pa levosahi vevuhia tataholo sohena God mo pete levosahi vevuhiau moiso.
- <sup>13</sup> La hinau akerihi mo tolu natu, la pa lo toho jejeu:  
 rasua, řomtoho, peresi na opoia,  
 pani hinau aulu hinira, enia opoia.

### Otori Sei Tanume Tapu Mo Lo Silera

**14** <sup>1</sup> Ha tau na opoia hina tiroma na maurimim, ale ha tau na řomimim i řilangi mata lavi la otori řuhuřuhu sei Tanume

Tapu i eři silea isamim, ale hinau atu mo řuhu jea hinira, enia matan vara ha eři vere na retimangovi sohena God mo mangovi kamim hinia.

<sup>2</sup>Matan haratu mo lo retireti na leo tinapua matea Tanume Tapu mo silea, mo sopo retireti isana tamlohi, pani isan God, matan mo sopo tea i rongovosahia, matan enia mo lo vere na hina luhu hin Tanume Tapu.

<sup>3</sup>Pani haratu mo lo retimangovi sohen God mo mangovia hinia, enia mo lo tueni na tamlohi vara la eři ulua hin Moli, ale mo lo retituetuenira, ale mo lo retinanauhira. <sup>4</sup>Haratu mo lo retireti hin te leo matea Tanume Tapu mo silea isana, enia mo lo tuenia hasena vara i ulua, pani haratu mo lo retimangovi sohen God mo mangovia hinia, enia mo lo tueni na vao kalesia vara la ulua.

<sup>5</sup>Ale, a pa avulahi vara kamim mo isoiso ha eři retireti hin la leo tinatinapua atu sei Tanume Tapu mo lo silea, pani i pa mele řuhu jea vara ha eři retimangovi sohena God mo mangovi kamim hinia. Retimangovi enia mo mele aulu jea na retireti na leo tinapua matea sei Tanume Tapu mo lo silera, i pa mele řuhu jea vara tea i eři posi leo atu matan vara vao kalesia la eři levosahi na řaramina, ale la pa eři ulua matana.

<sup>6</sup>Ale la voraiku peresi na vevoraiku, vara a mai isamim, ale a retireti isamim hin te leo tinapua hatea sei Tanume Tapu mo lo silera, i pa tueni kamim sohena sava? Pani vara a lavi te reti hin te hinau God mo vuhesia isaku, teni te hina lelevosahi, teni te retimangovi matea God mo mangovia isaku, teni te vujangi matea, ale haratu io, i pa tueni kamim.

<sup>7</sup>Mo sohena pue tangtangi teni te potikevu matea, mo sopo te mauri hinira, enira sohena, vara tea mo sopo soro tataholoi te vete hinira, hare i pa rongovosahi vete atu mo lo soro hinia? <sup>8</sup>Ale vara tea mo tiv na trumpet, ale rooroana mo sopo tataholo, hare i pa tatamahunia hasena mata vuro? <sup>9</sup>Ale mo sohena isamim, vara mememim mo lo retireti na leo matea tea i sopo eři rongovosahia, tea i pa eři levosahi na sava ka lo vereea sohena sava? Matan ka lo vaore purongo.

<sup>10</sup>Varařuhu, leo tinatinapua la lo toho na varama, ale mo sopo tea vara mo sopo te řaramina. <sup>11</sup>Pani vara na sopo levosahi na řaramin te reti hatea a pa sohena vinano isan haratu mo lo vereea, ale haratu mo lo retireti enia i pa sohena vinano isaku. <sup>12</sup>Ale matan ka lo opoia jea vara ha lavi te otori isan Tanume Tapu, mo řuhu vara ha usi God matan la haratu sei la eři tueni na vao kalesia tari vara la ulua.

<sup>13</sup>Matan haratu, haratu mo lo retireti na leo tinapua matea Tanume Tapu mo silea isana, mo tataholo vara i usiuseri vara i eři lavi na suiha mata i vereuli na řaramin la retireti atu. <sup>14</sup>Matan vara na lo usiuseri na leo tinapua matea Tanume Tapu mo silea isaku, mapuku mo lo usiuseri usuri na suihan otori atu, pani řomiku mo sopo rongovosahi na sava na lo vereea.

<sup>15</sup>Vara mo sohen haratu a pa vai na sava? A pa usiuseri usuri na suihan otori atu na mapuku, ale a pa usiuseri usuri na sava mo lo toho na řomiku

sohena; a pa lalavete usuri na suihan otori atu na mapuku, ale a pa lalavete usuri na reti enau na levosahi na řaramira. <sup>16</sup>Matan vara ko lo hasohaso God usuri na suihan otori atu na mapum, sohena sava natu, te tamlohi mo sopo tahisam i eři vere ‘amen’ vara mo sopo rongovosahi na sava ko lo vereia na nom vere meje isan God? <sup>17</sup>Matan korong, nom vere meje mo tataholo purongo, pani i pa sopo eři tueni pa tamlohi atu vara i ulua.

<sup>18</sup>Na vere meje isan God matan enau na lo retireti hin leo atu Tanume Tapu mo silea isaku mo tavera, mo jeu kamim mo isoiso. <sup>19</sup>Pani na naho vao kalesia, i pa mele řuhu jea vara a vere te reti i lima isara vara la eři rongovosahira matan vara i eři tuenira, mo jeua vara a vere na reti mo tari vaha sangavulu (10,000) na leo tinapua matea la sopo rongovosahia.

<sup>20</sup>La voraiku peresi na vevoraiku, řomřomi nona natuvarihii i sopo toho isamim. Ha pipi mata vai na hehe, pani ha tamlohi na nomim řomřomi.

<sup>21</sup>La ulia na Leu lara,

Moli mo vereia vara:

‘A pa retireti isan noku tamlohi  
na leo tinatinapua,  
ale na jingo vinano.  
Pani isoisona,  
la pa sopo tapurongo isaku.’

*Isa 28.11-12*

<sup>22</sup>Ale matan reti atu, retireti na leo tinatinapua, enira matamata matea mo sopo nona tamlohi rasua, pani nona tamlohi la sopo rasu. Ale retimangovi sei God mo mangovira enia matamata matea mo sopo nona tamlohi la sopo rasua, pani nona tamlohi la rasua. <sup>23</sup>Ale vara tamlohi kalesia tari la lo pulutahi jara matea, ale la lo retireti na leo tinatinapua Tanume Tapu mo silea isara, ale vara te vinano teni te tamlohi la sopo rasu la unu atu, řa levosahia vara la pa vereia vara kamim ka putu. <sup>24</sup>Pani vara kamim mo isoiso ka lo retimangovi, ale vara te vinano teni te tamlohi mo sopo rasu mo unu atu, i pa levosahia vara enia tamlohi hehe matea matan God i pa pisuhi na hehe na maurina, ale i pa rongovosahia na mapuna vara mo pete tia moiso mata talai non God. <sup>25</sup>Hina luhu na mapuna la mavuhesi, ale i pa jovi popovitoho, ale i pa lotu God i pa vereia vara, “Varařuhu purongo! God mo lo toho na livuhamim.”

### Posposi Tataholo Mata Lotu

<sup>26</sup>La voraiku peresi na vevoraiku, i pa sohena sava natu? Vara ha pulutahi jara matea, te hatea i pa lavi te vete, te tinapua i vujangi, te tinapua i vereuli te hinau paro God mo vujangia isana, te tinapua i pa retireti na leo tinapua matea Tanume Tapu mo silea isana, ale te tinapua i pa posposi reti atu matan vara vao kalesia la eři levosahia. Hinu tari

ka lo vaira, ha pa vaira matan vara tamlohi la pa ulua matara. <sup>27</sup>Vara tea la eñi retireti na leo tinapua matea Tanume Tapu mo silea isana, ha sopo tinañihia vara i jeu i rua teni i tolu la retireti, ale te hatea i retireti moiso, ale te tinapua i pa pete retireti, ale te hatea i pa vere na řarami nora retireti. <sup>28</sup>Pani vara mo sopo tea vara i eñi posi na nora retireti, la pa sakele malum purongo, ale la retireti isara hasera peresi God.

<sup>29</sup>Ha tinañihia vara te pñovet i rua teni i tolu la retireti, ale tatua pñovet la pa tapurongo usuri na sava la lo vere. <sup>30</sup>Vara God i vuhesi te hinau isan te tinapua mo lo sakele atu, haratu mo lo reti tiroma i pa sopo reve na nona retireti i peravu, pani i sile na masapa isana vara i eñi retireti. <sup>31</sup>Matan kamim mo isoiso ha eñi sile te reti God mo mangovia isamim, matea i retireti moiso ale matea, matan vara kamim mo isoiso ha eñi lavi te lelevosahi atu, ale ha ulua na nomim rasua. <sup>32</sup>Ha levosahia vara la haratu la lo vere na retimangovi God mo silea isara, enira la eñi hase taurilatira, la sasaovi mata masapa vara la eñi retireti hinia, <sup>33</sup>matan God enia mo sopo God mata kojokojohi, mo vono, enia God mata tamata, ale posposi tataholo akerihi sei la lo vaia na vao kalesia mata tapuhi tari non God.

<sup>34</sup>Hañai la pa toho malum na lolo ima lotu, matan mo tapu isara vara la eñi retireti ea, ale la pa tapurongo sohena leu mo vere. <sup>35</sup>Vara la opoia vara la levosahi mamahuni te hinau, la pa usi na tuara hinia na imara, matan mo sopo tataholo vara te hañai i retireti na naho vao kalesia.

<sup>36</sup>Ka řomi vara lelevosahi mata reti non God mo tapulo isamim, ale ka řomi vara mo isoiso isamim purongo? <sup>37</sup>Vara tea mo lo řomřomia vara enia pñovet matea, teni enia mo tapu, enia i pa řomřomi mamahuni na sava na lo ulia isamim vara enira retileu non Moli. <sup>38</sup>Vara tea mo lo kilau purongoi hinau nika, tamlohi atu mo sopo řuhu matan te hinau.

<sup>39</sup>Ale matan hinau tari atu la voraiku peresi na vevoraiku, ha opoia jea vara ha eñi vere na retimangovi God mo silea isamim. Ale ha sopo horo na retireti na leo tinapua sei Tanume Tapu mo silera. <sup>40</sup>Pani ha vai na hinau tari usuri na posposi tataholo na malelera tataholo.

### Vujangi Mata Sauteterahi Non Křisto

**15** <sup>1</sup>Ale la voraiku peresi na vevoraiku, na opoia vara ha mele řomřomi pa Retiřuhu sei na lo retivujavujangi kamim hinia sei ka lavia moiso, ale mo tikeli nake, ka pa lo turu řilangi hinia. <sup>2</sup>Ale ka lo juri hinia nake, vara ha lo taurilati řilangi reti atu sei na retivujavujangia isamim, vara i vono, korong nomim rasua enia hina purongo.

<sup>3</sup>Matan na pete sile kamim hin vujangi aulu atu hin la haratu Moli mo lo silera isaku moiso, enia vara Křisto mo mate mata noña hehe, sohena Retitapu mo vere, <sup>4</sup>ale usuri na noku vujangi, enia la tavunia, ale na hatolu rani God mo sauteterahia sohena Retitapu mo vere. <sup>5</sup>Ale hin rani



atu enia mo pala isan Peter, moiso isan la nona tamlohi usuri atu tupu sangavulu řomana mo rua. <sup>6</sup>Moiso, mo mele pala isana vao vorai kalesia matea na rani matea, evira mo jeu mo ngav sangavulu lima, (500) vao tavera hinira la pa lo mauri mo tikeli nake, pani tatuara la mate moiso. <sup>7</sup>Ale moiso mo pala isan James, moiso mo pa isana vahařule tari. <sup>8</sup>Hitahu mo pala isaku, mo sohena vara na sopo vora na noku rani vora tataholo. <sup>9</sup>Matan na nona vao vahařule enau na atano jea, ale mo sopo tataholo vara la toviau vara a vahařule matea, matan na lo levuti na vao kalesia non God.

<sup>10</sup>Pani řomřuhu non God mo vaiau na mai sava tamlohi nake, ale nona řomřuhu isaku mo sopo vano hina purongo. Mo vono, matan enau na voko řilangi mo jeu na vahařule tari, pani mo sopo enau haseku na lo voko, pani řomřuhu non God sei mo lo toho hiniau. <sup>11</sup>Mo sopo te hinau hinia vara hare natu mo retivujavujangia isamim vara enau teni enira, hina aulu hinia enia matan ka rasu na sava kama retivujavujangia isamim.

### Mele Turu Na Mateia

<sup>12</sup>Ale ha to vereia isaku, mata sava natu, tatuamim la lo vereia vara i pa sopo te sauteterahi na mateia? Na lo usia sohena matan kama lo retivujavujangia vara Křisto mo turu na mateia. <sup>13</sup>Matan, vara i sopo te sauteterahi na mateia, mo vereia vara Křisto mo sopo mele turu na mateia. <sup>14</sup>Ale vara Křisto mo sopo turu na mateia, nomam retivujavujangi enira la vano hina purongo, ale nomim rasua mo vano hina purongo. <sup>15</sup>Ale vara sohena, kamam nona vahařule kama lo retihalu hin God matan kama lo vereia vara God mo sauteterahi Křisto na mateia, pani vara reti atu mo varařuhu, mo vereia vara God i pa sopo sauteterahi na tamlohi. <sup>16</sup>Matan, vara la haratu la mate la sopo mele turu na mateia, Křisto sohena mo sopo turu na mateia. <sup>17</sup>Ale vara Křisto mo sopo mele turu na mateia, nomim rasua enia hina purongo, ale kamim ka pa lo toho na nomim hehe. <sup>18</sup>Ale la haratu la mate hin Křisto la tihai jejeu. <sup>19</sup>Vara nořa řomtoho hin Křisto enia matan mauri nike nake purongo, tamlohi tinapua la pa řomřomia vara enřa řa rongorongono vono.

<sup>20</sup>Pani mo vono! Enia hina varařuhu matea vara Křisto mo turu na mateia, enia vua tiroma hin la haratu la mate moiso.

<sup>21</sup>Matan sohen mateia mo mai na tamlohi matea, ale mele turu na mateia mo mai na tamlohi matea. <sup>22</sup>Matan hin Adam, tamlohi tari la mate, ale tamlohi tari hin Křisto la pa mele mauri. <sup>23</sup>Pani usuri na malele tataholo mata sauteterahi, Křisto mo tiroma, moiso la haratu nona na nona mele mai.

<sup>24</sup>Moiso pongi hitahu i pa pala hin rani atu vara Křisto i komo na suiha meresahi tari sei la aulu teni la lo tauri na suiha peresi na řilangi, moiso

i pa sile na nona suiha mata aulu na hinau tari isan God Tama. <sup>25</sup>Matan enia i pa tauri na suiha i tikeli rani atu vara mo tau vevuhi na nona meresahi tari na ruhuruhu palona. <sup>26</sup>Isoiso meresahi vara i pa komoa, enia mateia. <sup>27</sup>Matan Retitapu mo verea vara, ‘God mo tau vevuhi na hinau tari vara la pa toho na ruhuruhu palona’. *Psa 8.6* Reti atu mo verea vara, ‘hinau tari vara la pa toho na ruhuruhu palona’ mo memera purongo vara God Tama i pa sopo toho na ruhuruhuna. <sup>28</sup>Hin rani atu hinau tari la mai na ruhuruhun Natuna, ale Natun God sohena i pa hase taula i toho na ruhuruhun God Tama sei mo tau na hinau tari na ruhuruhuna, ale God i pa aulu na hinau tari na jara tari.

<sup>29</sup>Vara tamlohi la pa sopo turu na mateia, sava natu mo lo toho na ōromin la haratu la lo lavi na paptijo matan la haratu la mate moiso? Vara tamlohi la pa sopo turu na mateia, mata sava natu tamlohi la lo lavi na paptijo matara?

<sup>30</sup>Sava natu mo ōruhu na nomam vavahinau nike, matan mo lo tau na mateia na nahomam tarea? <sup>31</sup>Matan na lo vere tataholoia isamim la voraiku peresi na vevoraiku, noku hapahapa hin Kŕisto enia kamim sei, matan rani mo visa moiso, mariviti a lo mate matamim. <sup>32</sup>Sava hina ōruhu i pa malue na noku valum peresi maji jala sei, la tamlohi atu Ephesus, vara i pa sopo te sauteterahi na mateia? Vara mo sopo te sauteterahi, mo ōruhu vara ōa vaia usuri retireti nike vara,

‘Ōa vai na hanhani tavera,

ale ōa inu, matan pavuho ōa pa mate.’

*Isa 22.13*

<sup>33</sup>Ha sopo tinaŕihia vara tea i halu kamim hin haratu la lo verea lara, ‘Posposi nona tamlohi sasati i eŕi posi na posposi tataholo nona tamlohi ōruhu.’

<sup>34</sup>Ha rovo na nomim posposi sasaruhu, ale ha isoiso na hehe, matan tatuamim la sopo levosahi te hinau hin God. Na vere matan vara a vai kamim ha mahanuhanu.

### Epe Tuai Peresi Na Epe Paro

<sup>35</sup>Pani tea i pa usia vara, ‘Tamlohi mate la pa mele turu sohena sava? Ale epera la pa sohena sava?’ <sup>36</sup>Kamim tamlohi rongorongono vono! Sava ka lavoa i pa sopo eŕi mauri vara i sopo mate tiroma. <sup>37</sup>Ale sava ka lavoa, mo sopo enia natu mo mele tuvu, matan enia piri matea purongo, hina purongo vara piri wit teni te piri vipahai tinapua. <sup>38</sup>Ale God mo silea na epena usuri na masalona, ale mo sile na piri hatehateahi na epe tinatinapua. <sup>39</sup>Matan epe tari la sopo sohesohera, pani epe tamlohi enira la sohesohera, epe maji palo vati la tinatinapua, epe maji avuavu mo mele tinapua, ale epe maji tasi mo tinapua.

<sup>40</sup>Epe hinau na tuka la tinapua na epe hinau na varama, pani memera epe na tuka la tinapua, ale memera epe na varama la tinapua. <sup>41</sup>Memera

alo enia hinau matea, memera vitu enia mo tinapua, memera vitusarasara la mele tinapua, matan memera vitusarasara matea matea la tinatinapua.

<sup>42</sup>Ale mo sohena natu na sauteterahi nona mateia. Sava la tavunia enia i pa řovo, sava mo mele turu enia i sopo eři řovo. <sup>43</sup>Sava la tavunia enia hina purongo, ale sava mo turu enia mo řuhuřuhu jea. Sava la tavunia enia mo talekoleko, ale sava mo turu enia mo řilangi. <sup>44</sup>Sava la tavunia enia epe mata varama, ale sava mo turu enia epe matan na tuka. Vara epe matea matan varama nike, i pa epe matea matan na tuka.

<sup>45</sup>Sohen la ulia lara, ‘Tamlohi tiroma atu Adam mo mai tamlohi mo lo mauri’.

*Gen 2.7 Harua*

Adam atu mo pa mai hitahu, enia mo sile na mauri mata Tanumen God.

<sup>46</sup>Sava mo mai tiroma, mo sopo haratu matan na tuka, pani haratu mata varama, haratu matan na tuka mo pa usuria hitahu. <sup>47</sup>Tamlohi tiroma, enia mo tai na varama, mo malue na lepa, pani harua tamlohi enia mo tai na tuka. <sup>48</sup>Tamlohi tari na varama la lavi na epe varama sohen Adam, pani epeřa matan na tuka i pa sohen epen Křisto. <sup>49</sup>Nake řa sohen Adam, tamlohi mata varama, ale hitahu řa pa sohen Křisto sei mo tai na tuka.

<sup>50</sup>La voraiku peresi na vevoraiku, na vereea isamim, vara epe peresi na řae matan varama nike la pa sopo eři unu hin mauri atu na tuka, teni haratu i pa řovo i pa sopo eři unu hin mauri atu i sopo eři řovo.

<sup>51</sup>Ha tapurongo, a pa vere kamim na hina luhu matea. Enřa mo isoiso řa pa sopo mate, pani enřa mo isoiso řa pa posi, <sup>52</sup>vahatea purongo na isoiso roroa trumpet non God. Matan roroan trumpet atu i pa roroa, ale la haratu la mate la pa turu la sopo eři mele řovo. Enřa mo isoiso řa pa posi. <sup>53</sup>Matan epe mata řovo nike, i pa ru epe atu i sopo eři řovo, ale epe mata mate nike, i pa ru na epe i sopo eři mate.

<sup>54</sup>Hin rani atu vara hinau mata řovo mo ru na hinau i sopo eři řovo, ale epe mata mate i ru na epe i sopo eři mate, ha pa levosahia vara sava la ulia tuai moiso i pa masese natu vara,

‘Suiha mata mauri mo řolomi na mateia.’

*Isa 25.8*

<sup>55</sup>‘Eh mateia! Suiham enia epu?’

Eh mateia! Suiham mata sile na rongohaji enia epu?’

*Hos 13.14*

<sup>56</sup>Suiha mata sile na rongohaji non mateia enia hehe, ale suiha mata hehe enia leu non God. <sup>57</sup>Pani řa vere meje isan God sei mo lo sileřa na suiha matan vara řa jea na nořa meresahi tari hin nořa Moli Iesu Křisto.

<sup>58</sup>Matan hinau sei, la voraiku kalesia řuhuřuhu, ha turu řilangi, ale ha sopo hisuhisu, tarea ha vai na vavahinau non Moli matan ka levosahia vara hin Moli nomim vavahinau i sopo eři vano hina purongo.

### Silesilea Mata Kalesia Jerusalem

**16** <sup>1</sup>Ale usuri na hinau na nomim leta mata silesilea mata mania nona tapuhi, sava na vereea isana mara Galatia, kamim sohena, ha

pa vaia sohera. <sup>2</sup>Na tiroma rani na wik hatehateahi, kamim hatehateahi ha pa tauhasehi te mania na volimim, ale ha tau mamahunia, sohen ka hitea mo tataholo isamim, matan vara hin pongi atu vara a mai isamim, ka pete tatamahunia moiso vara a lavia. <sup>3</sup>Ale hin rani atu vara a pala, a pa řule la haratu ka viřonira moiso peresi na leta vara i vereulia vara enira la tai epu peresi na nomim silesilea i sivo Jerusalem. <sup>4</sup>Vara ka hitea vara mo tataholo vara a sivo peresira, mo lo řuhu purongo, la pa usuriau.

### Řomromi Mata Rorohi Corinth

<sup>5</sup>A pa rohi kamim vara a hahau roto Macedonia, matan na lo řomřomia vara a pa hahau roto Macedonia. <sup>6</sup>Korong a pa toho isamim makomona, vara i vono, a pa toho isamim na pongi hamariri, matan vara ha eři tueniau na maleleku na sava jara vara a vano ea. <sup>7</sup>Matan na sopo opoia vara a hite kamim mata makomo rani purongo. Na lo řomtoho vara a pa toho peresi kamim i peravu makomona vara Moli mo avulahi. <sup>8</sup>Pani a pa toho Ephesus i tikeli na pongin Pentecost, <sup>9</sup>matan masapa mata vavahinau matea mo roi isaku vara a eři vai te vavahinau non Moli nike, ale noku meresahi enira matuvana.

<sup>10</sup>Vara Timothy i mai isamim, ha kilau mamahunia, enia mo lo vai na vavahinau non Moli soheku. <sup>11</sup>Ha sopo tinařihia vara tea i hitelehilehia. Ha řulea na malelena peresi na nomim leřuhu vara i mai isaku. Na lo kilau vara a pa hitea peresi na tatua vorai kalesia tinapua i sopo tuai.

<sup>12</sup>Ale voraiřa atu Apollos, na lo usia řilangi isana vara i rohi kamim tolu na voraiřa kalesia tinapua nike. Pani mo sopo opoia vara i mai nake, i pa mai hitahu vara i hite te masapana.

<sup>13</sup>Ha lo kilau, ha lo turu řilangi na rasua, ha řomřilangi, ha řilařilangi. <sup>14</sup>Na hinau tari ka lo vaira, ha vaira na opoia.

<sup>15</sup>Ka levosahi Stephanas peresi na vao imana enira la mai kalesia tiroma nike Greece, ale la sile na maurira matan vara la vavahinau la tueni na kalesia tinapua. Na lo usia řilangi isamim la voraike peresi na vevoraiku, <sup>16</sup>vara ha sile na ololo isara peresi la haratu sei mapura la lo toho na nora vavahinau sohera. <sup>17</sup>Na lo avulahi tavera na mai non tahisamim Stephanas, Fortunatus peresi Achaicas, matan enira la lavi na jaramim nike peresiau. <sup>18</sup>Matan la vai na řomiku mo mele řuhu sohen la lo vaia na maurimim. Ha sile na ololo isana tamlohi sohen harihi.

### Isoiso Retioloolo Non Paul

<sup>19</sup>Vao kalesia nike Asia, la sohai na nora retioloolo isamim. Aquila enia Priscilla peresi na vao kalesia na imara la sohai na retioloolo řuhuřuhu isamim hin Moli. <sup>20</sup>La vorai kalesia tari nike, la sohai na nora retioloolo isamim. Ha tapatapai kamim hatehateahi na posposi tataholo nona tapuhi non God.

<sup>21</sup>Enau Paul na uli la retioloolo nike na limaku. <sup>22</sup>Vara tea mo sopo te opoia non Moli isana, lesati i pa toho isana. Noŕa Moli, o mai. <sup>23</sup>Ŕomŕuhu non Moli Iesu i pa toho isamim. <sup>24</sup>Noku opoia i pa toho isamim mo isoiso, hin Kŕisto Iesu. Amen.